



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ**

ք. Երևան

29.08.2019թ.

**Ո Ր Ո Շ ՈՒ Մ
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁԻ
թիվ ՍՑ-ԼՕ-2019/125**

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի
Քարտուղարությամբ՝ Լ. Անանիկյանի

Պատվիրատու՝ ՀՀ պաշտպանության նախարարություն
Մասնակից՝ «Էյչ Բի Էն» ՍՊԸ

Մասնակցությամբ՝
Մասնակցի ներկայացուցիչ՝ Բ. Գևորգյանի,

Գնման ընթացակարգի ծածկագիրը և առարկան՝
«ՀՀ ՊՆ ՆՏԱԴ-ԳՀԾՁԲ-12/7» ծածկագրով գնանշման հարցում, տպագրման և
տեղադրման ծառայությունների ձեռքբերում

ՀՀ գնումների հետ կապված բողոքներ քննող անձը (այսուհետ՝ նաև Բողոքներ
քննող անձ)՝ ուսումնասիրելով Հայաստանի Հանրապետության ֆինանսների
նախարարության կողմից 30.07.2019թ.-ի թիվ 26/26-1/12709-2019 գրությամբ «Էյչ Բի Էն»
ՍՊԸ-ին (այսուհետ՝ նաև Մասնակից) գնումների գործընթացին մասնակցելու իրավունք

չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը,

Պ Ա Ր Զ Ե Ց

1. Գործի նախապատմությունը.

ՀՀ ֆինանսների նախարարությունը, ՀՀ պաշտպանության նախարարության 29.07.2019թ. թիվ ՊՆ/02/1362-2019 գրության հիման վրա, 30.07.2019թ. «Էյչ Բի Էն» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

Բողոքներ քննող անձի 30.07.2019թ.-ի որոշմամբ գործը ընդունվել է վարույթ և 08.08.2019թ.-ին ու 16.08.2019թ.-ին նշանակվել են նիստեր:

Գործի քննությունն ավարտվել է 16.08.2019թ.-ին և Բողոքներ քննող անձի որոշման հրապարակման օր է նշանակվել 29.08.2019թ.-ին:

2. ՀՀ պաշտպանության նախարարության ներկայացրած փաստերը և դիրքորոշումը.

ՀՀ պաշտպանության նախարարությունը 29.07.2019թ. թիվ ՊՆ/02/1362-2019 գրությամբ դիմելով ՀՀ ֆինանսների նախարարությանը հայտնել է հետևյալը.

««ՀՀ ՊՆ ՆՏԱԴ-ԳՀԾՁԲ-12/7» ծածկագրով ընթացակարգի գնահատման արդյունքում 1-ին չափաբաժնում «Էյչ Բի Էն» ՍՊԸ-ն ճանաչվել է ընտրված /հաղթող/ մասնակից և անգործության ժամկետի ավարտից հետո վերջինիս ծանուցվել է պայմանագիր կնքելու վերաբերյալ, սակայն սահմանված ժամկետում վերջինս չի ներկայացել պայմանագիր կնքելու համար: Գնահատող հանձնաժողովը հիմք ընդունելով «Գնումների մասին» ՀՀ օրենքի 36-րդ հոդվածի 3-րդ կետի պահանջները որոշեց մերժել «Էյչ Բի Էն» ՍՊԸ-ի հայտը:»:

Միևնույն ժամանակ հիմք ընդունելով «Գնումների մասին» ՀՀ օրենքի 6-րդ հոդվածի 1-ին կետի 6-րդ ենթակետի «բ» պարբերության պահանջները ներկայացրել են «Էյչ Բի Էն»

ՍՊԸ-ի վերաբերյալ անհարաժեշտ տվյալները՝ գնման գործընթացին մասնակցելու իրավունք չունեցող մասնակիցների ցուցակում ներառելու գործընթաց նախաձեռնելու նպատակով:

3. «Էյչ Բի Էն» ՍՊԸ-ի ներկայացրած փաստարկները և դիրքորոշումը.

Բողոքներ քննող անձը 02.08.2019թ. գրությամբ դիմել է «Էյչ Բի Էն» ՍՊԸ-ին՝ հնարավորություն տալով ՀՀ ֆինանսների նախարարության կողմից 30.07.2019թ.-ի թիվ 26/26-1/12709-2019 գրությամբ նախաձեռնված ընթացակարգի վերաբերյալ ներկայացնել Մասնակցի գրավոր կարծիքը:

Մասնակիցը ստանալով կարծիք հայտնելու վերաբերյալ գրությունը, ինչպես նաև ծանուցված լինելով նիստերի տեղի, օրվա և ժամի մասին, չի ներկայացրել գրավոր դիրքորոշում, առարկություններ կամ կարծիք:

Ներկայանալով նշանակված նիստին Մասնակցի ներկայացուցիչը հայտնել է, որ Պատվիրատուի կողմից ստանալով պայմանագրի նախագիծը և պայմանագիր կնքելու առաջարկը, նույն պայմանագրի տեխնիկական բնութագրում կատարել է փոփոխություն, մասնավորապես՝ բնութագրում ավելացրել է, որ պատվիրատուի կողմից պաստառների տեղադրման վայրը պետք է նախապես վարձակալված լինի վերջինիս կողմից կամ այն հանդիսանա ՀՀ պաշտպանության նախարարության սեփականությունը:

4. ՍՑ-ԼՕ-2019/122 բողոքի քննության համար էական նշանակություն ունեցող փաստերը.

Սույն գործի փաստերի համաձայն՝

ՀՀ պաշտպանության նախարարության (այսուհետ՝ Պատվիրատու) կարիքների համար տպագրման և տեղադրման ծառայությունների ձեռքբերման նպատակով հայտարարվել է «ՀՀ ՊՆ ՆՏԱԴ-ԳՀԾՁԲ-12/7» ծածկագրով գնանշման հարցման ընթացակարգ (այսուհետ նաև՝ Ընթացակարգ):

Ընթացակարգի հրավերի թիվ 1 հավելվածով՝ տեխնիկական բնութագիր-գնման ժամանակացույցով սահմանվել է հետևյալը. «ՀՀ ՁՈՒ 20 լավագույն զինծառայողներին պատվերող ցուցավահանակների տպագրություն և տեղադրում: Լուսանկարների

աշխատանքային տարբերակները տրամադրում է պատվիրատուն, պաստառը՝ միաժույլ, 440-ից 510գր, 18 ք.մ, տպագրության խտությունը՝ 1080DPA, սարքի լայնությունը 3.2մ, տպագրության տեսակը՝ Eco-Solvent: Տեղադրման վայրը՝ ք. Երևան, ՀՀ մարզկենտրոններ և գլխավոր մայրուղիներ, ընտրվում է պատվիրատուի կողմից:»:

Ընթացակարգին մասնակցելու նպատակով, ի թիվս այլ մասնակիցների հայտ է ներկայացրել նաև «Էյչ Բի Էն» ՍՊԸ-ն:

Ընթացակարգի գնահատող հանձնաժողովի (այսուհետ՝ նաև Հանձնաժողով) 26.06.2019թ.-ին կայացած նիստի թիվ 6 արձանագրության համաձայն՝ «ՀՀ ՊՆ ՆՏԱԴ-ԳՀԾՁԲ-12/7» ծածկագրով ընթացակարգի 1-ին տեղ զբաղեցնող մասնակից է ճանաչվել «Էյչ Բի Էն» ՍՊԸ-ին:

Հանձնաժողովի 01.07.2019թ.-ի թիվ 7 արձանագրության համաձայն՝ Մասնակիցը ճանաչվել է ընտրված/հաղթող/ մասնակից և նույն արձանագրությամբ որոշում է կայացվել անգործության ժամկետի ավարտից հետո վերջինիս ներկայացնել պայմանագիր կնքելու առաջարկ:

Հանձնաժողովի քարտուղարի կողմից 10.07.2019թ.-ին armeps.am համակարգի միջոցով՝ ոչ ավտոմատ ծանուցման եղանակով «Էյչ Բի Էն» ՍՊԸ-ին ներկայացվել է պայմանագրի նախագիծը և պայմանագիր կնքելու առաջարկ:

Մասնակիցը պայմանագրի նախագծի ծանուցման հաջորդող 10 աշխատանքային օրվա ընթացքում ներկայացրել է իր կողմից հաստատված պայմանագրի 2 օրինակը և վճարման պահանջագիրը, սակայն պայմանագրի տեխնիկական բնութագրում կատարել է փոփոխություն, մասնավորապես՝ բնութագրում ավելացրել է, որ պատվիրատուի կողմից պաստառների տեղադրման վայրը պետք է նախապես վարձակալված լինի վերջինիս կողմից կամ այն հանդիսանա ՀՀ պաշտպանության նախարարության սեփականությունը:

Հանձնաժողովի 25.07.2019թ.-ին կայացած նիստի թիվ 8 արձանագրության համաձայն՝ «ՀՀ ՊՆ ՆՏԱԴ-ԳՀԾՁԲ-12/7» ծածկագրով գնանշման հարցման ընթացակարգի գնահատող հանձնաժողովը, քննարկելով «Էյչ Բի Էն» ՍՊԸ-ի կողմից գրությամբ ներկայացված պայմանագրի նախագիծը, որոշել է չհամաձայնվել առաջարկված պայմանագրի տեխնիկական բնութագրում կատարվելիք փոփոխությունների հետ, քանի որ տեխնիկական բնութագրի պայմանները սահմանված են եղել հրավերով և «Գնումների մասին» ՀՀ օրենքի 29-րդ հոդվածը հստակ սահմանում է հրավերում փոփոխություն կատարելու կարգը՝ ավելին Մասնակցի կողմից Օրենքի 29-րդ հոդվածի համաձայն

հրավերի պարզաբանում չի պահանջվել և Օրենքի 50-րդ հոդվածի 2-րդ կետի 2-րդ ենթակետի համաձայն գնման առարկայի բնութագրերը կամ հրավերի պահանջները չեն բողոքարկվել, իսկ Մասնակցի կողմից ներկայացված Հավելված 1-ով (Դիմում գնանշման հարցմանը մասնակցելու) հավաստել են, որ հրավերի պահանջներին համապատասխան ներկայացնում են հայտ, իսկ Հավելված 2-ով (Հայտարարություն մասնակցության իրավունքի պահանջներին համապատասխանելու մասին) հայտարարել և հավաստել են, որ բավարարում են «ՀՀ ՊՆ ՆՏԱԴ-ԳՀԾՁԲ-12/7» ծածկագրով գնանշման հարցման հրավերով սահմանված մասնակցության իրավունքի պահանջներին և քանի որ պայմանագրի կնքման ծանուցումից հետո Օրենքի 36-րդ հոդվածի 3-րդ կետի համաձայն «Էյչ Բի Էն» ՍՊԸ-ն չի ներկայացել պայմանագիր ստորագրելու համար, գնահատող հանձնաժողովը որոշել է մերժել «Էյչ Բի Էն» ՍՊԸ-ի հայտը:

5. Բողոքներ քննող անձի հիմնավորումները և եզրահանգումը.

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակացությանը, որ ՀՀ ֆինանսների նախարարության կողմից 30.07.2019թ.-ի թիվ 26/26-1/12709-2019 գրությամբ «Էյչ Բի Էն» ՍՊԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգն ենթակա է բավարարման, հետևյալ պատճառաբանությամբ.

Այսպես՝

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 6-րդ կետի «բ» ենթակետի համաձայն՝ ... մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե որպես ընտրված մասնակից հրաժարվել է պայմանագիր կնքելուց:

Նույն հոդվածի 2-րդ մասի համաձայն՝ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում: Տվյալ մասնակցի կարծիքը լսելուց հետո գնումների հետ կապված բողոքներ քննող անձը նույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին նույն հոդվածով

նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Օրենքի 35-րդ հոդվածի 1-ին մասի համաձայն՝ պայմանագրի ապահովում ներկայացնելու պահանջի հիման վրա այն ստանալու օրվանից 10 աշխատանքային օրվա ընթացքում ընտրված մասնակիցը պարտավոր է ներկայացնել պայմանագրի ապահովում: Ընտրված մասնակցի հետ պայմանագիր կնքվում է, եթե վերջինս ներկայացնում է պայմանագրի ապահովում:

Օրենքի 36-րդ հոդվածի 3-րդ մասի համաձայն՝ եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին ներկայացնում պայմանագրի ապահովումը, ապա նա զրկվում է պայմանագիրն ստորագրելու իրավունքից:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (այսուհետ՝ Կարգ) 32-րդ կետի 13-րդ ենթակետի համաձայն՝ իրավերով նախատեսվում է նաև, որ ընտրված մասնակցին պայմանագիր կնքելու առաջարկը և կնքվելիք պայմանագրի նախագիծը հանձնաժողովի քարտուղարը տրամադրում է էլեկտրոնային եղանակով: Ապրանքների գնման դեպքում պայմանագրի նախագծում ներառվում է ընտրված մասնակցի կողմից հայտով ներկայացված ապրանքի ամբողջական նկարագիրը,

Նույն կետի 14-րդ ենթակետի համաձայն՝ ընտրված մասնակցի կողմից հաստատված պայմանագրի նախագիծը պատվիրատուին ներկայացվում է գրավոր, և դա ներկայացնելու գրությունը հաշվառվում է պատվիրատուի փաստաթղթաշրջանառության համակարգում: Պատվիրատուի ղեկավարի կողմից պայմանագրի նախագիծը հաստատվում է այդ իրավասության առաջացմանը հաջորդող երկու աշխատանքային օրվա ընթացքում:

Կարգի 45-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ մասնակցին գնումների

գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Վերոնշյալ իրավակարգավորումների համադրված վերլուծության արդյունքում, Բողոքներ քննող անձը եզրահանգում է, որ ընտրված մասնակիցը, հանձնաժողովի քարտուղարի կողմից էլեկտրոնային եղանակով ստանալով պայմանագիր կնքելու մասին ծանուցումը և պայմանագրի նախագիծը, պարտավոր է 10 աշխատանքային օրվա ընթացքում պատվիրատուին ներկայացնել իր կողմից հաստատված պայմանագրի նախագիծն ու պայմանագրի կատարման ապահովումը:

Ընդ որում, եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին չի ներկայացնում պայմանագրի ապահովումը, ապա նա զրկվում է պայմանագիրը ստորագրելու իրավունքից:

Նման դեպքում առաջանում է «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «բ» ենթակետի դրույթների կիրառման անխուսափելիությունը, քանի որ վերջինիս գործողությունները (անգործությունը) գնահատվում են, որպես պայմանագիր կնքելուց ընտրված մասնակցի կողմից հրաժարում:

Վերը շարադրվածից ելնելով՝ մասնակիցը պետք է ընդգրկվի գնումների գործընթացին մասնակցելու իրավունք չունեցող մասնակիցների ցուցակում՝ երկու տարի ժամկետով, քանի որ իր գործողություններով (անգործությամբ), պատվիրատուին չներկայացնելով պայմանագրի օրինակը և/կամ ապահովումը, զրկվում է պայմանագիր կնքելու իրավունքից:

Սույն գործի փաստերի հիման վրա Բողոքներ քննող անձն արձանագրում է, որ.

ՀՀ պաշտպանության նախարարության կողմից հայտարարված «ՀՀ ՊՆ ՆՏԱԴ-ԳՀԾՁԲ-12/7» ծածկագրով գնանշման հարցման ընթացակարգի գնահատող հանձնաժողովի 26.06.2019թ.-ին կայացած նիստի թիվ 6 արձանագրության համաձայն՝ ընթացակարգի 1-ին տեղ զբաղեցնող մասնակից է ճանաչվել «Էյչ Բի Էն» ՍՊԸ-ին, իսկ 01.07.2019թ.-ի թիվ 7 արձանագրության համաձայն՝ վերջինս ճանաչվել է ընտրված/հաղթող/ մասնակից և անգործության ժամկետի ավարտից հետո Մասնակցին ներկայացվել է պայմանագիր կնքելու առաջարկ:

Մասնակիցը պայմանագրի նախագծի ծանուցման հաջորդող 10 աշխատանքային օրվա ընթացքում ներկայացրել է իր կողմից հաստատված պայմանագրի 2 օրինակը և

վճարման պահանջագիրը, սակայն պայմանագրի տեխնիկական բնութագրում կատարել է փոփոխություն, մասնավորապես՝ բնութագրում ավելացրել է, որ պատվիրատուի կողմից պաստառների տեղադրման վայրը պետք է նախապես վարձակալված լինի վերջինիս կողմից կամ այն հանդիսանա ՀՀ պաշտպանության նախարարության սեփականությունը:

Հանձնաժողովի 25.07.2019թ.-ին կայացած նիստի թիվ 8 արձանագրության համաձայն՝ «ՀՀ ՊՆ ՆՏԱԴ-ԳՀԾՁԲ-12/7» ծածկագրով գնանշման հարցման ընթացակարգի գնահատող հանձնաժողովը, քննարկելով «Էյչ Բի Էն» ՍՊԸ-ի կողմից գրությամբ ներկայացված պայմանագրի նախագիծը, որոշել է չհամաձայնվել առաջարկված պայմանագրի տեխնիկական բնութագրում կատարվելիք փոփոխությունների հետ և քանի որ պայմանագրի կնքման ծանուցումից հետո Մասնակիցը չի ներկայացրել պայմանագիր ստորագրելու համար, գնահատող հանձնաժողովը որոշել է մերժել «Էյչ Բի Էն» ՍՊԸ-ի հայտը:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում Բողոքներ քննող անձը հանգում է այն եզրակացության, որ «Էյչ Բի Էն» ՍՊԸ-ն, որպես ընտրված/հաղթող/ մասնակից, հրավերով սահմանված կարգով և ժամկետներում չներկայացնելով պայմանագիրը և/կամ պայմանագրի ապահովումը, հրաժարվել է պայմանագիր կնքելուց:

Տվյալ դեպքում ընտրված/հաղթող/ մասնակիցը հրավերով սահմանված կարգով և ժամկետներում չի ներկայացրել հրավերով սահմանված տեխնիկական բնութագրեր պարունակող պայմանագիրը և վճարման պահանջագիրը, որպիսի պայմաններում այդ հանգամանքը համարվում է որպես պայմանագիր կնքելուց հրաժարում, որը նախատեսված է Օրենքի 6-րդ հոդվածի 1-ին մասի 6-րդ կետի «բ» ենթակետով:

Ելնելով վերոգրյալից և ղեկավարվելով «Գնումների մասին» ՀՀ օրենքի 6-րդ հոդվածի 2-րդ մասով, 50-րդ հոդվածի 7-րդ մասի 2-րդ կետով՝ ՀՀ գնումների հետ կապված բողոքներ քննող անձը.

Ո Ր Ո Շ Ե Ց

1. ՀՀ ֆինանսների նախարարության կողմից 30.07.2019թ.-ի թիվ 26/26-1/12709-2019 գրությամբ «Էյչ Բի Էն» ՍՊԸ-ին գնումների գործընթացին մասնակցելու իրավունք

չունեցող մասնակիցների ցուցակում ներառելու նպատակով նախաձեռնված ընթացակարգը բավարարել:

2. «ԷյՋ Բի Էն» ՍՊԸ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ 2 (երկու) տարի ժամկետով:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ գնումների հետ կապված
բողոքներ քննող անձ՝**

A handwritten signature in blue ink is written over a circular official stamp. The stamp contains the coat of arms of the Republic of Armenia and text in Armenian. The signature is slanted and extends across the stamp.

ԼԵՎՈՆ ՕՀԱՆՅԱՆ